



Majleij mbouj ndaej doegsaw gvaq, hoeng de daj seiziq couh hag rox iem mou, youq ndaw mbanj henz mbanj loq okmingz.

Majleij bineix ndaej 25 bi, daxboh de bang de ra dah lwgsau beij de hung 5 bi ndeu guh yah. Majleij dangyienz mbouj nyienh, daxboh de naeuz mbwk hung gvaq sai, fouq daeuj heux. Euq mbouj gvaq bouxlaux, Majleij cij ndaej doxaeu lo.

Mehyah de heuhguh Sizyah. Sizyah maj ndaej gyaunde, couh-suenq ngoenzngoenz youq laj ndit guhhong, najnoh de cungj dwg haumaecq, fajnaj lumj aen makbingzgoj sug nei dwggyaez. Hoeng de caeuc Majleij doxdoengz, mbouj ndaej doeg gvaq saek ngoenz saw.

Doxaeu mbouj geij nanz, Sizyah caeuc Majleij naeuz: “Raeuz ciengx bitgyaeq ba, aeu 10 doiq.” Majleij mbouj rox vihmaz aeu ciengx aen soq neix. Sizyah gejnaeuz: “Huk, bouxlaux mbouj dwg naeuz saehnde baenz doiq lwi? Caemhcai gou heuhguh ‘Sizyah’, aeu Vahgun daeuj gangj, mbouj couhwdw 10 doiq bit ha?” Majleij dingq le riunyumnyum.

Daengz ngoenz haw, Sizyah caeuxcaux couh daeuj daengz gwnz haw, cigsoh buet bae giz gai bitlw. Lauxbanj raen Sizyah, riunyum naeuz: “Dahnuengx ha, yaek cawx bitlw ma, duz bitlw gou dwg duz bitmaz Sihlinz cingphuq, ciengx seizgan dinj, maj ndaej maengh gig vei……”

“Gou mbouj guenj duz bit mwngz maj ndaej baenzlawz, mwngz couh bang gou senj 10 duz bitboh caeuc 10 duz bitmeh okdaeuj.” Sizyah dajduenh gij vah lauxbanj gai bit.

“Yu, mwngz mbouj dwg hawj gou

hoj guh ha? Gou baenzlawz yawj ndaej ok duz lawz dwg bitboh, duz lawz dwg bitmeh? Gyoengqde mbouj miz geiq-hauh ha!” Lauxbanj naeuz.

“Gwnz haw baenzlai vunz, mwngz couh faen ndaej ok byawz dwg boux-sai, byawz dwg mehmbwk. Mbouj lai gangj lo, mwngz bang gou senj, moix duz gou lai hawj mwngz 5 gak ngaenz, senj mbouj deng, gou heuh mwngz aeu cienz ma.” Sizyah haengdingh naeuz.

Sizyah cawx bit ma ciengx ndaej song ndwen, bitboh bitmeh caen faen ndaej okdaeuj lo, cingqngamj dwg 10 duz bitboh, 10 duz bitmeh. Sizyah ut lwgfwngz geq gij seizgan gyoengq bitmeh ok gyaec, gag guhcaeang angq-vauvau.

Daengz 7 nyied, cingq dwg mwh bitgyaeq bwh ndei ok gyaec. Sizyah aeu youzcaet mai gwnz ndang gyoengq bit, faen baenz doiq bitboh bitmeh ndei.

Miz ngoenz ndeu, Sizyah raen duz bitboh riengz duz bitmeh geiqhauh wnq, de ganjgip gyaep duz bitboh gvaq lingh mbiengj bae. Hoeng mbouj geij nanz, youh raen lingh duz bitboh bae caeuc duz bitmeh geiqhauh wnq, de youh bae gyaep sanq song duz de. Mbouj haeujsim dawz, songde youh doxnem doxndiep, Sizyah youh bae gyaep. Buenq ngoenz roengzdaeuj, de youh huj youh baeg.

Ndwen haenx, ndaw cin vihliux guh ndei gij hong doihduz fuengzraq, cingj Majleij bae yangh souyihcan guh canghywdoihduz. Majleij moix ndwen cungj miz cienzhong lingx lo, Sizyah hix sim’angq raixcaix.

Majleij guh buenq bi lo, aenvih de rox aeu ywdoj bae yw duzvaiz duzmax dungxraeng caeuc gvanhceez-

yen, caemhcai mbouj sai geijlai cienz couh yw ndei, ndigah Majleij youh deng diuh daengz ndaw yienh cuzmuzgiz bae lo.

Majleij diuh bae ndaw yienh le couh gig noix ndaej dauq ranz lo, Sizyah ngoenzngoenz ciuqgoq duzbit couh lumj ciuqgoq lwgnyez bonjfaenh nei.

Mbouj rox ngoenz lawz, miz vunz naeuz hawj Sizyah, naeuz Majleij caeuc mehmbwk wnq doxnde lo. Sizyah buenq saenq buenq ngeiz. Gvaq le geij ngoenz, de laeglemx daeuj daengz ndaw singz, youq aen dou hung Majleij hwnjban yawjraen Majleij caeuc boux mehmbwk ndeu miz gangj miz riu.

Sizyah youh daej youh nauh, daej gaeuc lo, nauh gaeuc le, youh yaek

haeuj ndaw giz bae gauq. Majleij ndatheiq lo, sing hung hut: “Mwngz fatbag luba? De dwg boux doengzsaeh gou, mwngz gauj maz luenh ? Mwngz siengj bae gauq couh bae.”

Sizyah youh siengsim youh hozndat. De ndaq Majleij: “Mwngz dwg duzma, mwngz mbouj dwg bouxvunz!” Riengzlaeng doq buet hwnj aen banci bae ranz lo.

Sizyah dauq daengz ranz, ndoet mbouj roengz dungx, ninz mbouj ndaej ndaek.

Geij ngoenz le, boux cangh-ywdoihduz ndaw cin daeuj daengz ranz Sizyah hawj gyoengq bit dwk cimiyfangz, de raen gij geiqhauh gwnz ndang bang bit neix le, couh cam guh gij geiqhauh guh maz, Sizyah gangj le, de youh cam: “Gyoengq bit neix dwg ciengx gaj gwn ma?” Sizyah ngauz-ngauz gyaec dap naeuz: “Gyoengq neix dwg bitgyaeq, ciengx guh ceh.”

“Ciengx guh ceh?” Boux cangh-ywdoihduz riu naeuz, “Dahnuengx, mwngz cij ciengx 10 duz bitmeh, ciengx duz bitboh ndeu couh gaeuc yungh lo, mbouj……”

Caengz gangj sat, Sizyah daj ndawranz aeu fag sauqbaet he coh de baet gvaqbae, sing hung hat: “Deuz, deuz, bouxsai sou couhwdw yiengh-neix, couh rox boux ndeu aeu lai boux yah……”

Boux canghywdoihduz mbouj rox gyawz gangj loeng, da daengx bak aj caez.



Vamaedlaeh hai ndaej langh mbwn langh bya.

Dozsw

“Gou mbouj ndaej caiq gwn lo.” De ndenq aen doengjfaex hawj Siu Cuh, “Aen dungx yaek bengq dek lo.”

Siu Cuh riuhehe coux aen doengjfaex iq gvaqdaeuj, caiq aeu fagliemz dat faexcuk baenz gouh dawh, cienq ndang bae gwn.

Lungz Byauh ndwn hwnqdaeuj gvax daengz dangqnaj Siu Cuh, Siu Cuh vadvad fwngz coh de.

“Deuz, gaej yawj vunz gwn haeux.”

“Haxbaenh mwngz vihmaz yawj gou gwn haeux ne?”

“Mwngz caen dwgcaengz!” Siu Cuh youh cienq ndang gvaqbae.

De mbouj nyaenxsim caiq nguh Siu Cuh gwn haeux, gag maeuc wij, dinghdingh yawj gwnznanh gyoengq

·Sawcuenhvaez Lwgnyez·

Gij Golwngnyez Henz Dahhoengz

□ Lanz Haijyangz Moz Beibei / 蓝海洋 莫蓓蓓

duz moedndaem ram diuz gangjbya, diuz gangjbya dwg de haxbaenh ngamq vut youq gwnznanh, duzmoed yied comz yied lai, diuz gangjbya menhmenh daeh coh go faexhung baihde bae. Danghnaeuz bingzciengz de bungz raen, cungj aeu siengj caenh banhfap bae gauz, lumjbaenz duet vaq ok gong nyouh ndeu cung duzmoed sanq bae. Hoeng ngoenzneix de dauqfanj naihsim ngon, caemhcai

yawj ndaej angqfwngfwng, hix mbouj rox dwg bang duzmoed gwnzbya neix seizheiq ndei roxnaeuz dwg bonjfaenh bienq lo.

Sing fa doengjfaex goemq yinx Lungz Byauh yawj gvaqbae. Siu Cuh gaenq gwn imq lo, de cingq sousib, venj doengjfaex iq cang gijgwn youq gwnz nyefaex.

“Gwn liux le?” Lungz Byauh doq cam, “Gaeuc mbouj gaeuc gwn?”

“Gaeuc!” Siu Cuh aeu laeng-fwngz uet naengbak, “Seizneix mwngz bae ranz ba.”

“Vihmaz? Mwngz youh gyaep gou deuz?”

“Fwngz mwngz in lo. Lij dwg caeuxdi bae ranz yietnaiq gonq ba.”

“Mbouj youqgaenj, mwngz gvej nya faenh mwngz, gou naengh youq laj faexhung yietnaiq faenh gou.”

(caengz sat)